



Minggu, 21 Januari 2024

Ogen: Pilipi 4:6-7



Ola Aru Atendu



Aru ate, sitik pe la mereken kiniulin nandangi kegeluhen enda. Aminna aru ate e banci ngajuk kita lako ngasup erjaga-jaga ntah pe metenget kerna wari si pepagi tapi belinen ia mpengaruhi kegeluhen ku bas kebiaren nggeluh asangkan erpengarapen. Aru ate, meneken pengarapen, keriahen ukur rikut kemalemen ate. Sabap belinen kugapa ndia, la tetap ukur kerna wari si pepagi i bas menaken sada-sada paksa si man bentasen. Aru ate banci mabai sekalak jelma ku bas stress, depresi bage pe lit seh munuh bana. Sabab lanai lit akapna simehulina kerna paksa-paksa si reh.

Selalu ada mentari baru setiap pagi. Selalu ada kesempatan baru, tiap hari. Bagenda me motivasi rikut semangat si mbaru si isehken man banta. Gelah gedang ras semangat ateta ndalani kegeluhen enda. Sabap la bo lit kegeluhen i doni si la jumpa perbeben, kiniseran, kegagalen si banci ndabuh ku bas aru ate ndai. E maka ipersingeti kita maka teptep erpagi-pagi lit nge matawari pultak, si mpersingeti kita e jadi kesempatan man banta guna ndalani kegeluhen siibereken Dibata man banta.

Paulus i bas suratna man perpulungen Pilipi, isehkenna kata ajar man perpulungen e guna ndalani kegeluhen rikut kesempatan si ibereken Dibata alu mehuli. Ula aru ate kerna kai pe. Kerna ekonomi, masa depan anak-anak, kerna kesehaten ras sidebanna. Payo aru ate tandana la kita ngasup ngaturken kegeluhenta enda, e maka erpengendes ras erpenalemen man Dibata me sipentingna. Pindo man Dibata i bas pertoton si ibelasken, pusuh sierpengarapen. Sabab si la terukuri kita enggo iaturken Dibata i bas kiniersadanta i bas Jesus Kristus.

➤ Aru ate erbahan mate semangat dingen lanai tek man keleng ate Dibata